

'Landsbesluit' di glas getint mester wordo declará nulo

No a haci ningun investigacion promer cu a dicidi pa prohibi glas getint

ORANJESTAD - 'Si cos sigui asina, aki poco dia mi no por corre cu un muher blond band'I mi pasobra e ta kita mi atencion; e hendenan no por bisti bril di solo pasobra nan no ta wak bon y no por bisti peluca pasobra bo no por reconoce kende nan ta,' esaki Abogado mr. Andin Bikker a bias ayera merdia durante tratamiento di e caso caminda el a pidi pa Huez anula e arreglo di ley di trafico cu ta prohibi uso di glasan getint.

E demanda ta pa declara e 'landsbesluit' nulo.

Den e caso aki tanto mr. Bikker como mr. Delo Gomez a representá un grupo di persona, di cual alrededor 10 mil a firma e peticion pero a usa solamente number di algun pa motibonan tecnico, cu no ta di acuerdo cu e ley en cuestion.

Den e introduccion di e Abogadonan a wordo mostrá cu riba e isla aki tin entre 45 pa 50 mil vehiculo di motor ta corre rond, di cual mas cu 50% tin glas getint, sea cu el a bin asina for di fabrica of pone riba dje. Y nan ta kere cu e ta un custumber cu ta data di mas cu 20 aña atras.

Un di e puntonan pa cual ta cuestioná e ley ta cu e ta un violacion di privacidad di e ciudadano y uso di e propiedad manera cu e ciudadano kier.

Nan ta haya cu un ley cu tin un efecto grandi riba comunidad, mester por conta riba un apoyo grandi di representacion di pueblo den Staten. Y den e caso aki esey no a sosode. Parlamento



Foto Debby Kelly

Abogadonan mr. Andin Bikker y mr. Delo Gomez a wordo rondoná pa miembronan di prensa na momento cu el a sali di Corte, caminda nan a presentá e caso pidiendo Huez pa declará nulo 'landsbesluit' cu ta prohibi uso di glasan getint.

E otro foto ta ilustrá mr. Andresito Bikker mustrandó un di e pruebanan presentá den Corte cu ta un glas cu a haya un sla di piedra. Pero gracias na e tint e no a kibra pa e choller por sigui horta den e vehiculo.

solamente a aprobá e concepto general y no cada un di e

contenido di e leyman nobo. Miembronan di Parlamento mes den un reciente reunion a keha cu nunca nan a haya e 'landsbesluit' en cuestion pa mira. Esaki pasobra henter e producto a wordo hinca den otro dor di un grupo di funcionario publico. Constitucion nunca ta duna e autorizacion pa esnan cu no tin

e poder pa trece e cambianan grandi aki den ley, cu ta un violacion riba e derechonan basico di un ciudadano cu ta ancla den Constitucion.

E puntonan treci pa prohibi glas getint tabata e.o.: e chofer mester por mira bon y wordo mirá; si un vehiculo tin chofer; pa otronan mira si e chofer ta consciente di nan; pa Polis por

duna bon descripcion di un sospechoso tras di stuur; y pa Polis por mira actuacion di e chofer cu nan a duna ordo pa para pa haci investigacion. Mirando e puntonan aki, e Abogadonan a muestra cu niun momento a ser bisa cu a haci un investigacion riba e puntonan aki pa mira si nan ta basá riba realidad. Loke a causa hilaridad den Corte ta momento cu mr. Bikker a señalá cu te ainda e no ta consciente cu aki na Aruba tin un 'nightrider' (manera e serie di television) cu ta e unico vehiculo cu ta move sin chofer.

Mr. Gomez di su banda a muestra cu no a ser probá cu durante e ultimo 10 añanan tabatin accidente causá dor di autonan cu glasan getint; of cu autonan cu glas getint ta ser usa pa comete delito.

Durante presentacion di e dos Abogadonan, a muestra Huez riba e diferente tipo y gradonan di tint cu ta existi. Y tambe a muestra un glas di un bentana, cu tabata getint, cu un choller a kibra, pero dor di e tint e 'scherven' a keda pega y e no basha abao. Esaki a haci cu e unico gasto cu e tabatin ta un glas nobo, pasobra e choller no por a drenta den e auto pa horta mas cos.

Tambe a wordo mostrá riba e discriminacion cu tin den e ley, pasobra e autonan cu ta bini for di fabrica cu e tint, si ta ser permiti pa ley.

Manera ta corda, durante e conferencia di prensa di Ministerio Publico a wordo bias cu dificilmente por pasa na permiti cierto grado di tint, ya cu Gobierno no tin placa pa compra e aparatonan necesario. Mr. Gomez a haci un investigacion y a resultá cu nada Merca ora di compra 5 di e aparatonan bo ta haya nan na e prijs di 69 Dollar pa un. Y esun un poco mas sofisticá ta costa 169 Dollar. Pues no mester di capital pa compra esakinan. E resultado lo ta conoci dia 29 di Maart awor.

'Huez si mi tin un dama blond sintá banda di mi, esey tambe por ta un distraccion pa tráfico'

Mr. Andin Bikker